

湖湘

〔清〕李元度 撰 王澧华 校点

天岳山馆文钞 诗存

②

湖湘文库编辑出版委员会 岳麓书社

文库



〔清〕李元度 撰

王澧华 校点

天岳山馆文钞 诗存 ②

湖湘文库编辑出版委员会

岳麓书社



新
知
覺
PDG

图书在版编目 (CIP) 数据

天岳山馆文钞·诗存 / (清) 李元度撰; 王澧华点校. —长沙:

岳麓书社, 2009

ISBN 978-7-80761-223-0

I. 天… II. ①李…②王… III. ①古典散文—作品集—中国—

清代②古典诗歌—作品集—中国—清代 IV. I214.92

中国版本图书馆 CIP 数据核字 (2009) 第 073444 号



湖湘文库

湖湘文库编辑出版委员会

天岳山馆文钞·诗存(一、二)

据湖南图书馆藏本校点

著 者 [清]李元度

点 校 者 王澧华

责任编辑 马美著

特邀编辑 刘 柯

整体设计 郭天民

出版发行 岳麓书社

网 址 <http://www.yueluhistory.com>

地 址 湖南省长沙市爱民路47号

邮 编 410006

电 话 0731—88885616(邮购)

经 销 湖南省新华书店

印 刷 长沙健峰彩印有限公司

版 次 2009年7月第1版第1次印刷

开 本 960×640 1/16

印 张 67

字 数 780千字


书 号 ISBN 978-7-80761-223-0/G·706

定 价 148.00元

如有印装质量问题,请与承印厂调换

厂址:长沙市芙蓉区亚大路93号 邮编:410001

ISBN 978-7-80761-223-0



9 787807 612230 >



天岳山馆文钞卷二十三

随州知州前翰林院庶吉士徐公墓表

同治五年，余治军援黔，晤徐茂才树棠，端介竺谨，意洒然异之。越明年，驻师思南，茂才再拜请曰：“先府君下世，二十有三年矣。某无似，侍先君宦楚时，年幼，莫能纪其政绩所设施。第见所莅民乐，去则爇香雪涕，争走送之，他懿行亦未繇称述，不敢以虚善诬吾亲。惟隧道之石，无文以纪厓略，大惧遏佚前人光，敢请。”余作而曰：“表章前哲，素志也，曷敢以不文辞？”

按状：公讳步云，字汉卿，贵州安化人。曾祖某，祖某，父某，母王氏，继母傅氏，祖若父皆赠奉直大夫，妣皆赠宜人。公生有奇慧，书过目不忘，家故贫，父殖货于市，公随侍服劳，手一编，读弗辍。未冠入县学，旋廩于官。越九年举乡试。居京师十有四年，登嘉庆十三年进士，选庶吉士。散馆，改知县，历知湖北建始、安陆、光化等县，莅胥役严，诸弊皆厘剔。精听断，务在得情，不轻用捶楚。犁旦即起视事，无留牍。不为赫赫名，久而民益思之。课最，擢知随州，年垂七十矣，遂告归。归而宦橐枵然，藉授徒自给。初名树棠曰宝善，训之曰：“余在楚不名一钱，惟善以为宝，故命尔名。人惟自力于善耳，贫何伤？”主思郡凤冈书院凡八年，以无疾终，时道光二十五年某月日也，寿七十有八。子即树棠。公生平孝友，继母抚公如己出，公事之弥谨。

异母弟二，公亲督课，并奋于学，以廩生贡太学，白首无间言。树棠所及见知者止于此，其不及知者，盖莫得而述也。

乌呼，功利之习，其陷溺人心也甚痼。自科举业兴，士所以学，父师所以教，率以弋科名、跻臬仕为荣。有地治者，先问肥瘠为忻戚，及宦成而归，则宫室妻妾之欲，皆饬所求。虽取非其道，不暇顾，人亦罔或非之。未转瞬而恃人之资且立尽，盖身歿而子孙不能有也。公任牧令三十年，归而轮奐阡陌不少增于旧，即此足风励薄俗有馀矣。莅官时之政绩，岂待牘陈哉？爰表而出之，且勸树棠，俾益砺文行以光昭令绪云。

赠荣禄大夫福建台湾府北路理番同知张公墓表

嘉、道间，大湖以南，用文章经学称大师，海内无异辞者，推湘阴张公。公之学，无所不窥，少隶宛平籍，为诸生，有盛名。成邸、定邸各遣王孙来学《诗》。晚年历主宛平、濂溪、石鼓诸书院，出门下者竞以学行科第战绩显。所著《师白山房讲易》八卷、《礼记辑义》八十卷、《周官辑义》十二卷、《春秋经义》百二十卷，其《毛诗讲义》、《说文浅释》、札记，则官台湾时渡海失之。别撰《诗义钞》八卷。公于制举文，独辟风气，治经尤专笃，顾犹谓生平穷经，惟《春秋》为专门之学，可自信，馀非其至也。然公吏治卓绝，世更不尽知，则繇未究厥施，抑为经术文名所掩耳。

公讳学尹，字子任，学者称少衡先生。举嘉庆十五年顺天乡试，明年成进士，以知县发福建，权归化、莆田县事，补闽清、

侯官，终台湾府北路理番同知。在归化，教民种竹，竹成，各就山造纸，民赖以饶，至今归化纸遂甲闽产。县俗好讼，兼逋赋，有张、杨、罗三族，宋儒横渠、龟山、仲素三先生裔也，会杨、罗互讼，公曰：“此先贤裔，当以礼教之。”遂谒横渠祠，讲《西铭》，寻谒杨、罗二祠，召父老与讲豫章从学龟山渊源，皆感动，请罢讼，遂燔其牒。公见罗祠有巨碣，勒家训，首曰“国课先完”，因晓以大义，于是宿逋尽纳。莆田积狱数千有奇，有三十年未决者，公榜列案由，示讯期，听民自赴鞠，逾三月即注销，续控以新狱论，立决遣。又以催科抗弊久，乃揭欠户姓名榜通衢，注所逋于名下，输纳者麇至，积欠以清。县海口二十一所，平海澳其一也，都司廖起贵巡海，妄报渔户行劫，总督汪志伊檄副将庆善勒兵来捕，起贵从。公曰：“事无左证，奈何遽动兵？吾当独往按之。”副将不可，乃阳治具犒兵，期以翼日亭午发，而于薄暮微服出，夜行百里，厥明抵澳。澳口故有千总署，渔船出入，皆报千总登印册。取核之，报劫前六日，平海无一艘出口者。乃命晓事十人，从入城备质。涂遇起贵，告以故，起贵坚欲往，公叱之。副将为解，遂偕归。事白，十人者皆得免。

闽清民惑于鬼荫之说，多奄柩不葬，公下车，葬无主百八十棺。下令，凡免丧逾三月不葬者，官为收瘞，俗遂革。其在侯官也，未抵任前数月，以斗杀报者凡三狱，死三十一人。公专以教化清其源，闻警，即驰往谕禁之，事立寢。张、郑二氏交恶，众集矣，召之至，片言而解。又詹、刘二氏斗已成，公直衷其队，拗止之。终公任四年，无斗杀者。尤善治盗，清保伍，厚捕赏，设哨船，往往日晡犹坐堂皇献事，夜半已会哨海滨矣。又以其间创设救火具，浚省城河渠。闽俗尚博戏，曰花会，总督禁之。巨猾钟秀，总督與夫长也，开博局，吏莫敢谁何。公缚送督轅，汪

公大嘉许。寻禁标弁之入贡荔支苛索者，访获讼师，置诸法。

二十四年，擢台湾同知，犹督□□城工，竣始就道。道光元年，代理兴化府，寻赴本任同知。治鹿仔港，汉番杂处，盗贼相仇杀，胥役因缘为奸。船胥陈敬，年七十矣，道府胥役皆其党，被控至五十余次，莫敢问。公首案治之，严谕汉番毋相陵暴。建义塾二，以教番民之秀者。所辖七十二屯，番兵二千七百人，躬自训练，汰其老弱。以盗炽募健捕，凡十馀辈皆不用，最后得二人充捕长，厚饷之，遂擒逃犯王丁酉，斩以徇。台地沃衍，岁三熟，屯田岁租甚丰。公建议，除饷屯兵外，存其三以备缓急，馀转巢外国，运货入内地，官取其赢，以给修城建学诸费，议未行而公去位矣。

初，侯官某公子，颇事干谒，公屡裁抑之。会公子淫于市人妇，典史黎大风将掩执之，逾墙遁，堕邻圃中，呕哕累日，遂谗诸大府，将解大风任，公争之得免。公子衔公次骨，日夕腾蜚语，时汪公久去任，代者不察，遂为所中伤。舆论大哗，公夷然不屑也。

去官后，纵游江淮、燕豫、荆襄及岭南北，以经学教授生徒，簞箸益富。尝仿香山洛社故事，与欧阳坦斋先生诸公为湘中耆英会，凡十八人，公次第七。属海氛不靖，靖夷将军奕山、扬威将军奕经，先后出视师，三十年前弟子也，走书币招公，皆谢弗往。公尝言：“使我得尽心力，治鹿港三五年，当使台北一隅，屹然为海外雄镇。”乌呼！天殆欲公专力遗经，以大昌其学，故不使儒者之效，得竟所设施，而公之所就，固已兼循吏、儒林、文苑而一之矣。吾乡经学，自船山王氏、恒斋李氏、九溪王氏、陶山唐氏后，得公乃益张其帜，则凡幸不幸，曷足为公道哉？

公之世次详墓志，其卒以咸丰元年九月十九日，春秋七十有七，诰赠荣禄大夫。配殷氏，前卒；继室蔡氏，并赠一品夫人；

侧室杨氏，封一品太夫人。子二，虬，贡生，河南候补州同知，先公九年卒；自牧，诸生，布政使銜遇缺题奏道。女子一，适衡山陈源，以节孝被旌。孙九人，女孙九人，曾孙二人。

乌呼！公之政与学，不待表而传，元度抑不足以传公，顾自束发读公文，以未见公为憾，是用伐石系辞，举公之以经术饰吏事者，揭诸阡以谄奕祀，庶闻风者得兴起焉，其亦公之志也欤？

赠奉政大夫县学生黄高冈先生墓表

吾郡自宋朱子帅长沙，李练溪、吴伯英、邹行之、李良仲诸先生，亲受业其门，有十三君子之祀。其时康先生叔临为上蔡高弟，避地岳阳，讲伊洛之学，而李文定燔又以朱子弟子分教岳阳，吾平毛竹间先生，至徙家往从之游，郡中正学大明，可谓盛矣。元明以来，达人辈出，若刘忠宣、邓襄敏、方简肃、艾熙亭诸公，并以勋业名天下，其原皆自学出，而理学或为勋名所掩，韦布中独未闻有树帜而嚆其戴者。乌呼，盖其难也！且所贵乎理学者，岂必据讲席，标宗旨，高谈性命以为名哉？必能不自欺其幽独，又槁然见诸躬行，使并世之人，饮其和而自化，斯理学之真已。洞庭天岳间，先儒之遗韵未沫，意必有闾修尔室，不自弭殒，而默肩斯道之传者。若黄高冈先生，殆庶几矣。

先生讳魁九，易名思诚，字汝思，高冈其别字也。先世元初自江西迁巴陵之西乡，遂族焉。曾祖克修，祖德圣，以渔田起家。考讳元吉，例贡生，授经不责修脯。先生其长子也，自入县庠，即有志正学，不敦敦事举业，从金先生云五游。金尝著《道统录》，为时所推，先生实传其学。尝集同志为主敬社，其箴于坐右者，曰“唤起”，曰“截断”，皆直透本源。日必三复先儒语，曰：

“以父母之心为心，则无不爱之兄弟；以祖宗之心为心，则无不爱之族人；以天地之心为心，则无不爱之民物。”闻者多化服之。其引迪后进也，但就人情物理中导归实地，于性命天人之奥，未尝轻出诸口。遇父母忌日，必祭，必哀号，终身如一日。晚岁与弟析居，凡便于弟者胥畀之，时其寒暑饮食，拊之如婴儿，人以比温公之于伯康云。

初，先生有祖塋称吉壤，旁犹可祔一棺，先生父病革，其世父虑其卜葬此也，趣令别购。先生知其意，及世父歿，竟以祔之。从舅氏某卒，贫不能殓，先生年未冠，适抵其家，遽解衣襚之，忍冻归，仍赙其丧。汔先生卒，舅之子走哭尽哀，距其父歿四十馀年矣，其至性感人类此。

先生终于同治三年七月初四日，享年五十有八。病剧时，叹曰：“安得有善谈性理者乎？或可已吾疾也。”时天旱，众祷雨，先生曰：“我死之日必雨。”及属纊，雨果如注。所著曰《易经录要》、《春秋录要》，皆手写，无一笔苟。《诗经》未卒业。配龙氏，封宜人。子二，长海仪，咸丰八年举人，江西进贤县知县，加同知衔，赠先生如其阶；次本颐。女适李氏，以节孝被旌。孙三，曾孙二。葬鹭龙港西岸闵子巷之原。先生卒后十三年，海仪遗书丐元度表其墓。

呜呼！先生长予仅十四岁，又幸生同郡，宜可亲炙其言论。予不敏，少读先儒书，颇欲问涂，无同志以佐佑之，又崎岖戎马间，违其素志。比老，一无所就，顾安知并世有先生其人，乃失之交臂邪？抑可见先生暗然为己，不屑求见知于人矣。然使予得见先生，先生或不予拒，相与月锻季炼，发明十三君子之绪言，郡人多有志士，将感发兴起，不更大有人邪？而先生不可作矣，表先生墓，益使我前望古人，后顾来者，而澁然不能自克也。

中议大夫道衔加一级杨公寿山墓表

昔欧阳子表应山连处士墓，以谓处士歿且二十年，应山人至今思之，其矜孤寡独、凶荒、饥馑之民，皆曰连公亡，使吾无所依而生以为根，余尝诵其言而伟之，谓虽王彦方、陈太邱、管幼安之徒，不是过也，并吾之世，不获覩其人矣。若寿山杨公，殆所谓行之以躬，不言而信者邪？

公讳崇康，字遐龄，寿山其别字也，世居浏阳关山里。曾祖世杞，有隐德。祖豪士，考超廷，并以公贵，赠中议大夫，妣吴氏，继妣苏氏，并赠淑人。公生而闷伟，读书了大义，以治生故，弃举子业，谨身节用以养亲。初受田二百亩，晚增拓至十数倍，然未尝以财自封也。性嗜善若渴，凡造桥缮渡，治道涂，葺祠庙，及掩骼埋胔、施药放生诸务，辄斥重金为众倡。尤笃于宗族，杨氏自唐末迁浏，迄未立宗祠，先有祀产，以子姓不睦，析而分祀焉。公出重赀，倡建大宗祠，置产合祀，又修宗谱以联之。遇家忌，必斋必祭，终身如一日。延师课子若孙，必忠且敬。戚里有争讼，片言评曲直，辄如的破。或具樽酒通殷勤，一笑散去，甚则潜出赀寝事，不使其人知也。其恤贫窶也，近者米，远者饭，赋米有常期，老羸妇稚闻风至，或信宿不去，无厌心。病者药之，死则瘞以棺。每遇岁侵，谷翔贵，必减价以糴。年六十时，减佃租什一，并（觸）〔觸〕其积欠，用此人尤德之。

咸丰初，粤寇稔乱，大吏劝输民财助军饷，公慨然毁家以图报，前后捐饷几及二万缗。初由州同衔加二级，封奉直大夫，诰赠父若祖，继封朝议大夫，旋晋道衔加一级，诰授中议大夫，晋赠父祖如其阶。又援推广恩例，为曾祖追请都司衔，且为高祖永

彩、太高祖代武追赠昭武都尉，妣皆赠恭人。长子隆蔚，叙布政司理问衔；次隆曷，累加同知衔，妣赠隆蔚四品阶；次隆银，次隆熙，各加游击衔；又次隆周，叙都司衔。并急公所得，而家益隆隆起，固未尝毁也。公教家内外有别，整肃若朝仪，训子尤严，广坐中辄峻词诃斥，甚则横挞随之。持躬庄正，竟日危坐无惰容，妇女足不逾梱。当会食，佣者自外至，皆空席避之，足见其家法矣。公终于同治五年八月二十八日，年六十有五。原配毛淑人，先公卒。生子四、女一。继娶李氏，生隆周。孙十一人，女孙八人，曾孙三人，女曾孙一人。葬罗家坊虎形山，卯首酉趾。

公卒后十一年，隆曷以姻谊故，具状属元度表其隘道。余谓公今之连舜宾也，舜宾以处士终，公阶至三品，所遇微有间，而其鞭心植行，与其为惠于乡里则先后同揆，宜既歿而人思之，与处士一辙也。惜余无欧阳子之文，不足为公重。抑欧阳子谓后生子弟，闻处士之风者，时尚未远，使更三四世，传闻有时而失，则惧不复能知处士之详。乌呼！余之表公，犹斯志也。后有式斯墓者，其弗谓古今人不相及哉！

赠建威将军恤赠都司赐祭葬杨公墓表

咸丰八年十月壬子，蓝翎守备衔补用千总杨公桂芳，从巡抚衔浙江布政使李忠武公战死于庐州府属三河镇，事闻，诏赠都司，视都司阵亡例议恤，赐祭葬，赏云骑尉世职，祔祀湖南北、江西、安徽各昭忠祠。其孤玉书等，招魂葬衣冠于湘潭十三都六甲之流霞冲，礼也。越十有一年，当同治七年，玉书已累功擢提督衔记名总兵、壮勇巴图鲁，赐孔雀翎，与平河北捻匪，诏锡正一品封，于是公得赠建威将军，配何夫人，得封一品太夫人。又六年，为同治十

三年十二月癸酉，太夫人考终里第，乃以光绪元年四月庚午，合葬流霞冲，距公卜葬时，十有八年矣。玉书等属元度为文表其墓。

按状：公字礼堂，湘潭人。曾祖讳某，祖讳某，父讳河青，本生父水青，祖若父并赠建威将军，妣皆一品夫人。公少读书，通大义，寻厌薄章句，事骑射，补县学武生。咸丰二年，粤寇犯长沙，时湘乡罗忠节泽南，率其弟子李公续宾练乡兵戍贼，即忠武公也。公冒风雨走湘乡，讲求团练法，归而部勒其乡人。忠节起兵讨贼，公从之，遂隶忠武麾下，由潭而岳，克武昌，收蕲、黄，大膊田家镇，徇兴国、大冶，剗黄梅，钹广济，进蹴九江，分兵攻湖口。五年，从曾文正入江西，克弋阳、广信，复义宁。时武昌再陷，自江西回援。六年十月，武汉复，公以先登功叙外委。七年春，从攻九江。公请分兵翦除旁近州县及濒江贼垒，使得贼成孤注，忠武韪之。乃随剿蕲、黄，拔小池口伪城，得旨赏蓝翎，擢把总。寻繇间道攻拔湖口，复彭泽。八年四月，遂克九江，诏晋公千总，加守备銜。会忠武乞假省亲，公从至鄂矣，忠武适奉命进规庐州，公不忍离忠武，遂从入皖。八月，克潜、太、舒、桐四县。贼于三河镇筑伪城一，坚垒九，我军夷其九垒，城垂破。忽伪英王陈玉成，纠捻酋张落刑，分道来援，众十万，连营百里。我军止五千人，深入绝地，又血战久，精锐多伤夷。忠武谕部众曰：“我义当死国，若属可自图生也。”公慷慨言曰：“公不负国，某等安忍负公！”遂皆力战死之。公之自鄂赴皖也，驰书属何夫人曰：“吾志在报国，本不望生还。昔人以马革裹尸为幸，今观之，亦寻常事耳。吾傥死国难，宜善抚儿辈，以成吾志。吾家世植德，子孙宜有兴者。”

夫人为同县某公之女，七岁即育于杨氏，能得舅姑欢。先世遗产薄，夫人拮据捭茶，规画井井，能使公无内顾之忧。及讣至，

夫人制泪字孤，委诸子于学，脩脯必从丰。玉书及其弟必仁，并继父志从戎。不数年，玉书擢至今职，必仁擢湖北游击，加副将衔，是用有晋封之命。及假归，太夫人训之曰：“尔父没于王事，尔等幸能自立，致通显，恤典外复膺褒赠之荣，始愿不及此也。吾戚族中多食贫守节妇，此中艰苦，吾已备尝之。其斥己财以助保节堂，胜日陈鼎养多矣。”保节堂者，县人所建以恤嫠者也，太夫人弥留时犹以此为训，命节丧葬费以厚饮之，其志事可想见矣。

公靖节时，年三十有八，夫人卒年五十有二。子四，长玉书，次必仁，次希震、时敏。女二，长早卒，次适同县郭君松林。初，公一见郭君，奇其才，即以子妻之，历官福建、湖北提督，为时名将，世以此服公知人。

呜呼！公之忠与夫人之德，皆不待表而传，顾尝闻曾子论君子，其云“临大节不可夺”，公既克践斯言矣，而其可以托孤而寄命者，夫人亦无嫌焉，宜其能成公志于身后也。抑又考古忠臣烈士，暴骨沙场，有葬衣冠之礼，太史公《封禅书》曾及之。汉前将军关侯墓在当阳，而华阳万里桥左，别有衣冠墓，盖昭烈帝招魂而葬之，故地近惠陵也。公栖神于此，夫人复合衲之，以坚同穴之义，皆礼之变而不失其正者。故具揭于阡，俾千百祀后式斯墓者有征焉。

赠建威将军吴公墓表

光绪元年，今天子既嗣服，推恩中外臣工，各加秩予荫，又覃恩封赠厥父祖，文武阶一品者，得封四世如其官。于是记名提督、长江水师瓜洲镇总兵、赏戴花翎、讷恩登额巴图鲁吴君家榜，得赠其显考长远公为建威将军，时公卒二十有八年矣。

公讳映广，字长远，先世自江阴迁益阳之沾溪。曾祖忠敬，隐德弗曜。祖良溥，父辉智，并以家榜贵，赠建威将军，祖妣邓氏，妣彭氏，并赠一品夫人。公昆弟三，序居长。家世清贫，不自封殖。公生有至性，及长，胆识过人，尝以寄才自命，顾世方承平，潜幽处奥，无阶以自进，遂隐于耕。谨身节用，以孝弟力田闻，视世事泊如也。降年弗永，中道云殂，道光十八年五月二十一日以疾终，春秋二十有五。配倪氏，后公十七年卒，赠一品夫人。子一，即家榜。

初，公之卒也，父老皆恻惜之，谓怀奇不遇如公，又赍志早逝，末繇自见于世，天道其不可问邪？迨咸丰中，粤寇起，家榜杖策从军，隶淮阳水师，转战数行省，用首功洊历今职，为时名将，至是奉制书赠官四世，各焚黄于隧，父老则相顾叹嗟曰：“吴公有子，足申其志于身后矣。”明年，家榜自淮扬寓书，属元度表墓。

元度窃叹朝廷推恩锡类，褒显臣子之亲，用以教忠而作孝者，何其厚也。夫古之人子，禄不逮亲，有茹恨终天已耳，今则子孙能自立，列官于朝，逢国大庆，辄有褒纶之锡，盖古上祀追王之礼所推，如公及公之祖若父，并当含笑九京矣。抑可见士果敦厉名行，虽夭阏于生前，而潜德幽光，必有时而发，而其发之大小迟速，则又视子孙之所就为程。然则为人子孙者，尤当知自奋哉！公墓在沾溪，与弟映宽合葬。谨揭表于阡，既塞家榜之孝思，抑使凡为子者知所劝也。

封奉直大夫唐公善亭墓表

呜呼，道俗之敝久矣！人各封其财，自私自利，视昆仲、宗

族、乡党，如秦越人之相视肥瘠，求其舍苗发以济人泽物，不为也。而陈仲弓、王彦方、茅季伟辈，独能以匹夫为善一乡，史氏书之，而方州之志，亦各书其郡县中嗜善诸先民，为广厉风教之助。欧阳公表连处士墓，流连感喟，亦谓表一人以风天下也。以余所见闻，若唐丈善亭，其殆庶几乎？

公讳邦庆，字友道，湘潭人，善亭其别字也。曾祖讳某，祖讳某，赠奉直大夫，配王宜人，寿百有二岁，以一堂五世旌。考讳某，赠阶如其祖，寿八十。配陈宜人，寿八十有四。娣姒中年跻九十者又二人。时称唐氏寿种，不虚也。公少好读书，以综家枋故未竟其业，遂一意教其子。有子二人，并克成公志。公以子贵，封奉直大夫，而尤以好善闻于乡。

初，宗祠地湫隘，公捐田七亩，卜爽垲更焉。族子弟赴试，乏资斧，捐田十亩助之。金甲仑者，公父所捐地，殓道殍者也。公复捐山下田六亩，造槽予葬者。县俗多溺女，公捐田三十亩。贫不能举者，岁饩谷三石，两期而止，俾自育。其穷独无告者，七十以上，岁饩谷三石，捐田如育婴之数。惧其久而无纪也，置一廛于青山市，额曰“二之堂”，取“安”“怀”义也。其他救困济急，完人夫妇，治津梁道路，辄视事巨细，定斥金之多少。公家本中贵，故人尤以为难。配陈宜人，某公之女，事舅姑克谨，尤和于筑里。公所为诸善事，宜人多赞成之。乌呼，公可谓不以财力自私，而能行道于妻子者矣。

公卒同治七年四月十一日，寿七十有七。宜人少公二岁，以咸丰十一年十一月十一日，先公七年卒。合葬金甲仑之原。子传惺，增贡生，光禄寺署正銜，候选训导；传惇，咸丰戊午举人，五品衔候选内阁中书。女长适方先英，以节孝旌。次适国子生方先封。孙五，女孙九，曾孙男女九。

公既卒之八年，传惇属元度表其墓，其请至四三不懈。元度与传惇同读书城南，耳公善行最悉，谓可入史家《卓行传》也。属纂修《通志》，遂缀于编，又表其荦荦大者，揭诸阡以示唐氏子姓，且俾县人劝焉。

封武德骑尉国子生喻公琢圃墓表

惟喻氏之先，以五代梁太保药为近祖，居豫章。七世孙曰九，曰武，迁县东义口市，遂为平江人。明正统间，有讳元英者，出粟千二百石助振，英宗敕奖为义民，赐羊酒，复其家，语在《通志》、府县《志》。传九世至鼎先，家中落。鼎先生锦万，精雷岐术，遇大疫，众畏传染，不相闻，独躬往诊治，且施以药，所活亡算。将卒，梦神示葬所，子百川往迹之，讯其主，则故所全活者也，立献地，坚不受值。百川兄弟寻以孝弟力田起家，众谓地灵所致云。

公讳传金，字琢圃，百川公仲子也。生而伟岸，读书通大义，百川晚婴目疾，不欲离子舍，遂弃举子业，入国学，颺理家枋，业益隆隆起。卜筑七里山，又考室大江壖，费皆以万计。自奉俭黻，独施予不少吝。尝助修寿世、利济诸桥，各斥百馀金，不勒石自表。而尤以积谷为本务，乡人利赖焉。平江故山国，人浮于田，每岁青黄不接，贫者以衣物向富民质谷，秋熟还之，加息什二三不等，岁如其额，俗称“头谷”。虽取息，而散时值贵，敛时值多钱，几与无息等，而缓急有可恃，艰食者便之。当是时，公兄弟及群从并饶于货，各以所积谷润乡里，岁凡数万石。合一县计之，不下百万石。虽岁洊饥，不害也。道光辛卯大侵，谷翔贵，公减息二成以贷，自本邑外，浏阳、长沙、义宁诸州县，踵求者

日千计。洎咸丰初，粤寇警，人思避乱，虑质物遭剽掠，前法遂尽废，民失所倚，识者用为隐忧。余近纂《通志》及《县志》，论积贮，于此法三致意焉。每溯公昆仲盛时重粟劝分情势，未三十年，而其风已不可复矣。

公终于咸丰二年四月九日，寿七十有二。配方氏，继吴氏，再继方氏。子六，长盛纲，次六品封盛敬，并先卒；次守御所千总衔盛藻，后公一年卒；次监生盛平，出嗣公弟传曾；次千总衔盛萼，先卒；次六品封例贡光奎。女子三，适方氏、萧氏、方氏。孙八，曾孙十，元孙一。公卒后二十四年，光奎具状属元度表其隧道。

昔欧阳公表应山连处士墓，称其遇岁饥，出谷万斛以粜，而市谷之价卒不能增，旁近县民皆赖之。公之务本计，减息平粜，其为德于乡，视连处士无多让，且足嗣乃祖原英^①公之美而相为辉映。故特表公行谊揭诸阡，既又推论积谷之盛衰本末，著其关系吾乡大利害者，以致“那颂”先民之思，而为乡人之知本务者风焉。

林朴庵先生墓表

呜呼！以余所见节母之子孙，未有不显融光大者也。其困厄加甚者，食报加速，若遇无良之族属，从而鱼肉之，彼其人，不旋踵必澌灭以尽，而为所鱼肉者，转藉以动心忍性，增益其所不能，天道至不爽也。故凡为节母子者，必能立身行道，乃无忝于所生。若朴庵林公，其一也。

公讳介揆，字朴庵。父子闻，繇粤迁平，遂为平江人。海内林氏皆闽种，公为孝子櫟之后，櫟由进士官县令，事详史志，后

^①篇首称“元英”，此处作“原英”，当有一误。